

# Lög Félags íslenskra félagsvísindamanna

## Icelandic Social Science Association

### I. kafli. Félagið

**1.gr.** Heiti félagsins er Félag íslenskra félagsvísindamanna, skammstafað FÍF. Heimili þess og varnarþing er í Reykjavík. Félagssvæði þess tekur til alls landsins.

**2.gr.** Hlutverk Félags íslenskra félagsvísindamanna er:

- Að vinna að bættum kjörum félagsmanna og gæta hagsmuna þeirra í kjara- og réttindamálum.
- Að fara með samningsumboð fyrir félagsmenn gagnvart samtökum launagreiðenda.
- Að standa vörð um réttindi félagsmanna á vinnumarkaði og að upplýsa þá um réttindi þeirra og skyldur.
- Að vinna að öryggi félagsmanna á vinnustað
- Að stuðla að samstarfi við innlend og erlend stéttarfélög

**3.gr.** Félagið er aðili að Bandalagi háskólamanna.

### II. kafli. Félagsmenn

**4.gr.** Félagsmenn geta orðið:

- Þeir launamenn sem hafa viðurkennt lokapróf í félagsvísindum frá háskóla eða hliðstæðum menntastofnunum.
- Þeir sem starfa sem sérfræðingar á sviði félagsvísinda og hafa viðurkennda háskólamenntun í hliðstæðum greinum.
- Háskólanemar sem lokið hafa 30 eininga háskólanámi geta orðið félagar með takmörkuðum réttindum og skyldum. Slík aðild getur varað allt að 5 árum. Nemar greiða ekki gjöld til félagsins meðan þeir eru í námi nema þeir þiggi laun á tímabilinu.

Atkvæðisrétt á fundum og rétt til setu í stjórn hafa þeir sem eru fullgildir félagar.

Beiðni um félagsaðild skal beina skriflega til félagsins, ásamt prófskírteini og öðlast hún gildi þegar félagið hefur samþykkt hana.

**5.gr.** Úrsögn úr félaginu skal vera skrifleg og taka gildi um önnur mánaðamót eftir að hún berst félagsstjórn eða þegar kjarasamningur er laus. Úrsögn skal þó ekki taka gildi berist hún eftir að vinnustöðvun hefur verið boðuð hjá vinnuveitanda viðkomandi félagsmanna á meðan á vinnustöðvun stendur.

Félagsmaður, sem segir sig úr félaginu, á ekki tilkall til eigna þess.

### III.kafli. Aðalfundur

**6.gr.** Aðalfundur hefur æðsta vald í málefnum félagsins. Aðalfundur skal halda í febrúar ár hvert. Skal til hans boðað með minnst viku fyrirvara og er hann þá lögmætur. Tillögur um lagabreytingar skulu hafa borist stjórn eigi síðar en tveim vikum fyrir aðalfund. Þeirra skal getið í fundarboði. Á aðalfundi ræður einfaldur meirihluti í öllum málum nema þeim sem snerta breytingu á lögum félagsins. Til lagabreytinga þarf 2/3 atkvæða fundarmanna.

**7.gr.** Á dagskrá aðalfundar skulu vera eftirfarandi liðir:

1. Lögð fram skýrsla stjórnar.
2. Lagðir fram endurskoðaðir reikningar félagsins.
3. Ákveðið árgjald, sbr. 10. gr.
4. Tillögur um lagabreytingar, ef fram koma.
5. Kosin stjórn og varastjórn, sbr. 12. grein.
6. Kosnir tveir skoðunarmenn reikninga.
7. Önnur mál.

**8.gr.** Komi til þess að stjórn segi af sér störfum skal hún boða til aukaaðalfundar og nýir fulltrúar kosnir til sama tíma og fráfarandi fulltrúar voru áður kosnir.

**9.gr.** Reikningsár félagsins er almanaksárið.

**10. gr.** Félagsmönnum er skylt að greiða árgjald sem skal ákveðið á aðalfundi. Tillögur um breytingar skulu kynntar í fundarboði.

### IV.kafli. Stjórn, varastjórn og samninganefnd

**11.gr.** Stjórn félagsins skal skipuð fimm mönnum; formanni, varaformanni, gjaldkera, ritara, og meðstjórnenda sem kosnir eru til eins árs. Tvo varamenn skal kjósa til sama tíma. Formann skal kjósa sérstaklega en að öðru leyti skiptir stjórnin með sér verkum.

Stjórn félagsins ræður málefnum félagsins með þeim takmörkunum sem lög þessi setja. Hún tekur nánari ákvarðanir um starfsemi félagsins og ber ábyrgð á fjárreiðum þess. Gerðir stjórnar skulu bókaðar.

**12.gr.** Samninganefnd félagsins skipa aðal- og varamenn í stjórn og hún velur formann samninganefndar. Nefndin kallar til aðra félagsmenn, starfsmenn og sérfræðinga eftir þörfum. Verkefni samninganefndar eru:

1. að undirbúa og samþykkja kröfugerð félagsins vegna kjarasamningsviðræðna
2. að taka ákvörðun um það hvort leitað skuli eftir samþykki félagsmanna til verkfallsboðunar
3. að vera stjórn félagsins til ráðgjafar um kjaraatriði og túlkun kjarasamninga.

Verði ágreiningur í samninganefnd um tiltekið mál skal greiða atkvæði um það og ræður afl atkvæða úrslitum. Falli atkvæði jöfn ræður atkvæði formanns.

Stjórn félagsins skal kynna félagsmönnum kjarasamning og bera hann undir atkvæði þeirra félagsmanna sem undir samninginn heyra. Rafræn atkvæðagreiðsla skal vera jafngild atkvæðagreiðslu á félagsfundi.

Ákvarðanir um samninga eða annað er varðar kjör félagsmanna verða aðeins teknar af þeim sem starfa hjá þeim vinnuveitanda eða vinnuveitendum sem samningurinn nær til.

## **V. kafli. Félagsfundir og félagsslit**

**13.gr.** Félagsfundi skal halda svo oft sem þurfa þykir, þó alltaf 10% félagsmanna krefjast þess. Félagsfundi skal boða með a.m.k. viku fyrirvara.

Stjórn getur vísað samþykktum félagsfundar til allsherjaratkvæðagreiðslu meðal félagsmanna. Afl atkvæða ræður úrslitum mála nema um annað sé sérstaklega getið í lögum þessum.

**14.gr.** Félaginu verður ekki slitið nema það sé samþykkt af 3/4 hluta greiddra atkvæða í allsherjaratkvæðagreiðslu. Í tillögu um félagsslit skulu vera ákvæði um hvernig eignum félagsins skuli ráðstafað.